

Ditelpai Carleto!

Ence l'Union di Ladins de Fascia, con sie president Fernando Brunel, vel ge palesar sia recognoszenza a Carlo Rossi del Baila

Caro Carleto, l Consei de l'Union di Ladins de Fascia te disc n ditelpai gran e fort per chel che t'as fat al ben de la cauja ladina.

Carleto, ensema a sia sor Rita, l'à viventà e tegnù auc i valores arpé da nesc antenac, la cultura e le tradizion ladine.

Ti egn del '70 Carleto, te si enciaria de assessor del Comun de Soraga, l'à portà inant le scomenzadive de l'Union di Ladins de Fascia. Recorde le deliberazion de Comun per aer n Comprenjorie demò per Fascia, anchecondi Comun general, per aer l'ensegnament del ladin te scola, i toponimes ladins, l'ensegnament del todesch te scola, enlouta de gran besegn per l'economia.

L'era i egn di gregn mudamenc te la vita sozjala e economica de noscia Val. L'era i tempes che jir de contra al voler politich de la Provinzia de Trent no l'era sori.

Con lege provinciala del 1975 vegn metù sù l'Istitut Cultural Ladin, egn dò l Museo, de chel che Carleto e sia sor Rita i é stac benefatores e gregn sostegnidores.

Co la regoeta de firme te duta Fascia – a chela che Carleto à dat na man – per la lege de scomenzadiva popolare, l'é stat arjont del 1976 l recognosciment giuridich di Comuns Ladins de Fascia, n auter varech emportant per la mendranza ladina te la provinzia de Trent.

Ti egn '80 vegn metù sù l Grop folcloristich, de chel che Carleto l'é stat gran sostegnidor.

Recorde Carleto per si empegn sozial te so paìsc, Soraga: na vita entrìa da monech de la geja de



Carleto Rossi del Baila con sia sor Rita.

Sèn Piere. Da dute le ore, da le 5 da doman col freit, a pe, co la roda e dò jà de età co l'auto, sun troi da Roisc a te geja. A sonar le ciampane, a man: Carleto l'era bon de n sonar 3 da soul, una col pe, a temp... e no l'é per nia sori!. A tegnir dut en orden, puzenà coche carenea. Chisc l'é mie recorc de Carleto.

Ditelpai Carleto, tia vita scempia, rigorosa, de lurger, de coche t'as soportà tie mal, l'é n ejempie per duc.

N ditelpai ence a chi che ge é stac apede e l'à didà te l'ùltim temp de sia vita.

*A inom de l'Union di Ladins
L president
Fernando Brunel de la Riza*